

Kia ora roa koe.

Atirikona Brocklehurst, Nepia.

Kei te mihi atu nga minita pakeha katoa o te Pihopatanga o Waiapu nou ka whiriwhiria nei mo tena turanga hui. Ma te Atua koe e manaaki.

MIHI KI TE PIHOPA.

KAIKOHE.

Oketopa 3rd. 1928.

Ki te Etita,

Hastings.

E Kara,

I te hui a Te Komiti Tumuaki i noho ki Ahipara i te 22 ki te 24 o nga ra o Hepeitema, 1928. ka paahitia te Motini e whai ake nei:

“Kia tukua he mihi ma tenei hui ki te Rev. Pererika Akuhata Peneti. mona kua karangatia nei hei Kaitimata i te tahuhu mo nga Pihopa o Aotearoa: mona i riro hei kai-whakaputa i te whakaaro o nga Kaumatua i roto i te 50 tau kua pahure; hei whakaatu ano hoki i te hari nui o enei iwi. me te inoi kia tau ki runga i a ia te Maru o Ihowa, hei mea e kaha ai ia ki te arahi i tona iwi Maori.”

Ko te hui tuatahi tenei a Te Komiti Tumuaki i muri mai i tou karangatanga ki te turanga Pihopa mo te iwi Maori. na reira ka tukua atu tenei mihi ano a tenei wehenga o to iwi Maori e noho atu nei i tenei takiwa o Aotearoa.

Kai Ora mai ano i roto i nga manaakitanga a Te Matua i te Wahi Ngaro.

Na to mokai nei i roto i te Mahi,

W. H. Panapa.

Hekeretari o Te Komiti Tumuaki.

TE WAIPIRO.

Na te Etita.

Mehemea ka whakariterite tatou i te ahua o te iwi Maori o tenei wa. ki to ratou ahua i te 20 tau ka taha ake nei, e tika ana kia whakamiharo tatou ki te pai o tenei wa.

Kua ngaro rawa atu nga mahi whakatu tahua waipiro. Kua uaua rawa te kitea o te wahine e haurangi ana, a kua torotoru rawa nga taane e kitea ana te haurangi i nga taone. He aluatanga tenei e tika ana hei whakawhetaianga ma tatou ki to tatou matua i te wahi ngaro. Kua ngawari haere te kai-waipiro a te iwi Maori.

He aha ra nga take i penei ai?

1. Kua neke rawa ake te maramaranga o te iwi Maori. Kua mohio haere tatou ki nga hua o a tatou mahi. Kua mohio tatou ki nga taonga tika a te pakeha hei manaaki ma tatou, me nga taonga hei ruke atu ma tatou.